

欽  
定  
全  
唐  
文

欽定全唐文卷六目錄

新文藝出版社藏書

太宗三

頒示禮樂詔

令河北淮南諸州舉人詔

功臣世襲刺史詔

答魏徵手詔

量修雒陽宮詔

賜功臣密戚墓地東園祕器詔

令道士在僧前詔

金史卷之二十一  
荆王元景等子孫代襲刺史詔

大水求直言詔

冊封薛延陀二子爲小可汗詔

贈堯君素蒲州刺史詔

封懷化郡王李思摩爲可汗詔

討高昌詔

答房元齡請解僕射詔

答長孫無忌等上河清表詔

答荆王元景等請封禪詔

官皇侶等子孫詔

詰沙門法琳詔

詳定封禪儀詔

贈百濟王扶餘璋光祿大夫仍令嫡子義慈襲封  
詔

求訪賢良限來年二月集泰山詔

停封禪詔

賜竇靖詔

矜宥周隋名臣子孫罪犯詔

皇太子用庫物勿限制詔

答皇太子承乾詔

刊正氏族詔

追封巢王元吉詔

授長孫無忌司徒詔

授房元齡司空詔

禁諱盜詔

宥党仁宏答房元齡等手詔

追復息隱王皇太子禮詔

欽定全唐文卷六

太宗 三

頒示禮樂詔

先王之辨方正位體國經野象天地以制法通神明以施  
化樂由內作禮自外成可以安上治民可以移風易俗揖  
讓而天下治者其惟禮樂乎固以同節同和無聲無體非  
飾玉帛之容豈崇鐘鼓之奏日往月來朴散淳離淫慝以  
興流湎忘本魯昭所習惟在折旋魏文所重止於鄭衛秦  
氏縱暴載籍咸亡漢朝循緝典章不備時更戰國多所未

遑雅道淪喪歷茲永久朕恭承明命嗣膺寶歷懼深馭朽  
情切納隍憑宗廟之靈資股肱之力上下交泰遐邇乂安  
率土阡危旣拯之於塗炭羣生遂性思納之於軌物興言  
正本夕惕在懷蓋知禮樂之情者能作識禮樂之文者能  
述作者之謂聖述者之謂明朕雖德謝前王而情深好古  
傷大道之旣隱懼斯文之將墜故廣命賢才旁求遺逸探  
六經之奧旨採三代之英華古典之廢於今者咸擇善而  
修復新聲之亂於雅者並隨違而矯正莫不本之人心稽  
乎物理正情性而節事宜窮高深而歸簡易用之邦國彝

倫以之攸敘施之律度金石於是克諧今修撰既畢可頒天下俾富教之方有符先聖人倫之化貽厥後昆

令河北淮南諸州舉人詔

朕以寡薄嗣守鴻基實資多士共康庶政虛己側席爲日已久投竿捨築罕值其人自親巡東夏觀省風俗興言至治夕惕兢懷然則齊趙魏魯禮義自出江淮吳會英髦斯在山川所感古今寧殊載佇風猷實勞夢想宜令河北淮南諸州長官於所部之內精加訪採其孝悌淳篤兼閑時務儒術該通可爲師範文詞秀美才堪著述明識治體可



委字民并志行修立爲鄉里所推者舉送維陽宮各給傳乘優禮發遣當隨其器能擢以不次若有老病不堪入朝者具以名聞庶巖穴靡遺俊乂可致務盡搜揚之道稱朕意焉

功臣世襲刺史詔

周武定業胙茅土於子弟漢高受命誓帶礪於功臣豈止重親賢之地崇其禮秩抑亦固磐石之基寄以藩翰魏晉已降事不師古建侯之制有乖名實非所謂作屏王室永固無窮者也隋氏之季四海沸騰朕運屬殷憂戡翦多難

上憑明靈之祐下賴英賢之輔廓清寓縣嗣膺寶歷豈予  
一人獨能致此時迺既共資其力世安而專享其利乃睠  
於斯甚所不取但今之刺史即古之諸侯雖立名不同而  
監統一也故申命有司斟酌前代宣條委共理之寄象賢  
存世及之典司空齊國公無忌等或材稱人傑望表國章  
論道廟堂寄深舟楫用資文武誠著艱難折衝聞外隱如  
敵國或志力忠烈實爲心膂或氣幹強果是曰爪牙策名  
運始功參締構義貫休戚效彰夷險嘉庸懿績簡於朕心  
宜委以藩鎮改錫土宇無忌可趙州刺史改封趙國公尚

書左僕射魏國公元齡可宋州刺史改封梁國公故司空  
蔡國公杜如晦可贈密州刺史改封萊國公特進代國公  
靖可濮州刺史改封魏國公特進吏部尚書許國公士廉  
可申州刺史改封申國公兵部尚書潞國公侯君集可陳  
州刺史改封陳國公刑部尚書任城郡王道宗可鄂州刺  
史改封江夏郡王晉州刺史趙郡王孝恭可觀州刺史改  
封河閒郡王同州刺史吳國公尉遲敬德可宣州刺史改  
封鄂國公并州都督府長史曹國公李勣可蘄州刺史改  
封英國公左驍衛大將軍楚國公段志元可金州刺史改

封襄國公左領軍大將軍宿國公程知節可普州刺史改  
封盧國公太僕卿任國公劉宏基可朗州刺史改封夔國  
公相州都督府長史鄆國公張亮可澧州刺史改封鄖國  
公餘官食邑並如故即令子孫奕葉承襲

### 答魏徵手詔

省頻抗表誠極忠款言窮切至披覽忘倦每達宵分非公  
體國情深匪躬義重豈能示以良圖救其不及朕在衡門  
尚惟童幼未漸師保之訓罕聞先達之言值隋祚分離萬  
邦塗炭慄慄黔黎庇身無所朕自二九之年有懷拯溺發

憤投袂便提干戈蒙犯霜露東西征伐日不暇給居無寧  
歲降蒼昊之靈稟廟堂之略義旗所指觸向平夷弱水流  
沙並通輜軒之使被髮左衽化爲冠蓋之域正朔所頒無  
遠弗屆及恭承寶厯寅奉帝圖垂拱無爲氛埃靜息於茲  
十有一載矣蓋股肱罄帷幄之謀爪牙竭熊羆之力協德  
同心以致於此自惟寡薄厚享斯休每以大寶神器憂深  
責重嘗懼萬幾多曠四聰不達何嘗不戰戰兢兢坐以待  
旦詢於公卿以至隸阜推以赤心庶幾刑措但頃年以來  
禍衅旣極又缺嘉偶荼毒未幾悲傷繼及凡在生靈孰勝

哀痛歲序屢遷觸目摧感自爾以來心慮恍惚當食忘味  
中宵廢寢是以三思萬慮或失毫釐刑賞之乖實繇於此  
昔者徇齊叡知資風牧以致隆平翼善欽明賴稷契以康  
至道然後文德武功載勒於鐘石淳風至德永傳於竹素  
克播鴻名永爲稱首朕以虛薄多慙往代若不任舟楫豈  
能濟彼巨川非藉鹽梅安得調夫鼎味朕聞晉武帝自平  
吳以後務在驕奢不復留心治政何曾退朝謂其子劭曰  
吾每見主上不論經國遠圖但說平生常語此非貽厥子  
孫者也爾身猶可以免指諸孫曰此等必遇亂及孫綏果

爲淫刑所戮前史美之以爲明於先見朕意不然謂曾之不忠其罪大矣夫爲人臣當進思竭誠退思補過將順其美規救其惡所以爲治也曾位極台司名器隆重當直詞正諫論道佐時今乃退有後言進無廷諫以爲明智不亦謬乎顛而不扶安用彼相公之所諫朕聞過矣當置之凡案事等絃韋必望收彼桑榆期之歲暮不亦康哉良哉獨慙於往日若魚若水遂爽於當今遲復嘉謀犯而無隱朕將虛衿靖志敬佇德音

量修雒陽宮詔

雒陽宮室創自有隋朕因其成功無所改作今屋宇湮壞者宜量加修葺使纔充居處自外材木宜分賜雒州郭內貧民因水損居宅者

賜功臣密戚墓地東園祕器詔

乾坤合德爰著易簡之功君臣一體克成中和之治遠取諸物若舟楫之濟巨川近取諸身猶股肱之戴元首同心叶契存歿以之故諸侯列葬周文始創其禮大臣陪陵魏武重申其制去病佐漢還奉茂鄉之塋夷吾相齊終託牛山之墓茲蓋往聖垂範前賢遺則錄曩昔之宿心篤始終



之大義者也皇運之初時逢交喪掃除多難光啟鴻業謀臣武將競進轅門之前明德異才爭趨魏闕之下或雲雷伊始功參締構或光華在旦績著弼諧及密戚懿親舊齒宿德委質先朝特蒙顧遇者自今以後身薨之日所司宜即以聞並於獻陵左側賜以墓地並給東園祕器事從優厚庶敦追遠之義以申罔極之懷

令道士在僧前詔

老君垂範義在清虛釋迦貽則理存因果求其教也汲引之迹殊途窮其宗也宏益之風齊致然大道之興肇於邃

古源出無名之始事高有形之外邁兩儀而運行包萬物而亭育故能經邦致治反樸還淳至如佛教之興基於西域逮於後漢方被中華神變之理多方報應之緣匪一洎乎近世崇信滋深人覬當年之福家懼來生之禍由是滯俗者聞元宗而太笑好異者望真諦而爭歸始波涌於閭里終風靡於朝廷遂使殊俗之典鬱爲衆妙之先諸華之教翻居一乘之後流遞忘反於茲累代朕夙夜寅畏緬惟至道思革前弊納諸軌物況朕之本系出於柱史今鼎祚克昌旣憑上德之慶天下大定亦賴無爲之功宜有改張

闡茲元化自今以後齋供行立至於稱謂其道士女冠可在僧尼之前庶敦本之俗暢於九有尊祖之風貽諸萬葉告報天下主者施行

荆王元景等子孫代襲刺史詔

皇王受命步驟之迹以殊經籍所紀質文之道匪一雖治亂不同損益或異至於設官司以制海內建藩屏以輔王室莫不明其典章義存於致治崇其賢戚志在於無疆朕以寡昧丕承鴻緒寅畏三靈憂勤百姓考明哲之餘論求經邦之長策帝業之重獨任難以成務天下之曠因人易

以獲安然則侯伯肇於自昔州郡始於中代聖賢異術沿革隨時復古則義難頓從尋今則事不盡理遂規模周漢斟酌曹馬採按部之嘉名參建侯之舊制共治之職重矣分土之實存焉已有制書陳其至理繼世垂範貽厥後昆維城作固同符前烈荊州都督荆王元景梁州都督漢王元昌徐州都督徐王元禮潞州都督韓王元嘉遂州都督彭王元則鄭州刺史鄭王元懿絳州刺史霍王元軌虢州刺史虢王鳳豫州刺史道王元慶鄧州刺史鄧王元裕壽州刺史舒王元名幽州都督燕王靈夔蘇州刺史許王元

祥安州都督吳王恪相州都督魏王泰齊州都督齊王裕  
益州都督蜀王愔襄州刺史蔣王惲揚州都督越王貞并  
州都督晉王治秦州都督紀王慎等或地居旦奭夙聞詩  
禮或望及閒平早稱才藝並爵隆土宇寵兼車服誠孝之  
心無忘於造次風政之舉克著於期月宜冠恒冊祚以休  
命其所任刺史咸令子孫代代承襲有司仍准前詔詳爲  
條制奏聞俾克本枝之盛隨天地而長久刺舉之榮與山  
河而無絕

大水求直言詔

暴雨爲災大水泛溢靜思厥咎朕甚懼焉文武百寮各上封事極言朕過無有所諱諸司供進悉令減省凡所力役量事停廢遭水之家賜帛有差

冊封薛延陀二子爲小可汗詔

天地之德平分於四時皇王之道無偏於萬物故能亭育黎庶覆燾區夏聲教咸洎於遐方爵命不遺於殊俗薛延陀真珠毗伽可汗器宇沈毅識具明允夙見時機早稟正朔忠誠峻節克著於塞外貢獻琛賚不絕於王府加以訓勗裔嗣輯寧種落俱率藩職咸慕朝風其子沙耽彌葉護

拔酌達度莫賀咄設頡利苾並志懷敦確氣幹強果或深  
竭忠款乃心闕廷或遠經朝覲拜首軒陛言念丹誠良以  
嘉尚宜錫徽號用申褒寵拔酌可肆葉護可汗仍賜狼頭  
纛四鼓四頡利苾可達度莫賀咄葉護賜狼頭纛二鼓二  
仍令左領軍大將軍梁方師持節備禮冊命

贈堯君素蒲州刺史詔

隋故鷹擊郎將堯君素往在大業受任河東固守忠義克  
終臣節雖桀犬吠堯有乖倒戈之志而疾風勁草實表歲  
寒之心爰踐茲境追懷往事宜錫寵命以申勸獎可追贈

蒲州刺史仍訪其子孫以聞

封懷化郡王李思摩爲可汗詔

天地大德覆載極於八荒日月貞明照臨周於萬物是以  
哲王撫運聖人垂範經邦立政之道取法於造化興亡繼  
絕之義靡隔於華夷惟彼北戎代居荒塞養畜牧於天山  
之外擅勇敢於瀚海之濱逮其末葉狂愚嗣位侵盜之釁  
禍結於諸華苛暴之風毒被於大漠酋豪攜貳部衆離阻  
革面者相望於道路請命者填委於闕廷朕情切納隍志  
存懷遠乃令上將拯其將溺元戎纔動倒戈相繼旣而屠



者歸命單于反接分地之長解解而來王引弓之民盡落  
而內附龍城旣殄狼望遂空朕愍其破亡恕其瑕釁解縛  
焚櫬賜以再生收電迴霜宥以寬政於是選內外之職分  
珪組以授之擇肥饒之地設州縣以處之開倉庫以恤其  
饑寒馳輜軒以問其疾苦恩俾中夏禮均舊臣十載於茲  
矣朕受命三靈因心百姓爰初薄伐非貪闢土之功泊於  
克定實宏安民之道久欲存其亡國返其遺萌尚恐瘡痍  
未瘳衣食不足今歲月已積年穀屢登衆種增多畜牧蕃  
息繒絮無乏咸棄其羶裘菽粟有餘靡資於狐兔便可復

其故庭繼其先緒歸三祠於沮澤旋十角於廬山使復會  
蹕林弭其依風之思重宴樂水遂其向日之歡然則左方  
旣建右地已設必俟君長一其號令自非蠻貊貴種醢落  
忠誠何以宣布朝化輯寧蕃服右武侯大將軍化州都督  
懷化郡王李思摩器懷沈毅識用詳明早慕皇風夙效丹  
款故寵以賜姓榮以高爵內典徼循之重外受連率之寄  
譽光朝職誠簡朕心錫以藩號紹其宗祀可乙彌泥孰俟  
利苾可汗並賜之鼓纛仍令就其部備禮冊命突厥及胡  
在諸州安置者並令渡河還其舊部俾夫世作藩屏同之

帶礪長保邊塞傳諸後昆

討高昌詔

明罰勅法聖人垂懲惡之道命將出軍王者成定亂之德  
故三苗負固虞帝所以興師鬼方不恭殷宗所以薄伐朕  
嗣膺景命君臨區夏宏大道於四海推至誠於萬類憑宗  
社之靈藉股肱之力億兆獲乂尉候無虞建木棘林山經  
靡紀之域幽都大夏王會不書之君莫不革面內款屈膝  
請吏襲冠帶於魏闕均征賦於華壤而高昌麴文泰猶爲  
不軌敢興異圖事上無忠款之節御下逞殘忍之志往經

朝謁備加恩禮谿壑難滿曾無報效禽獸爲心遽懷凶狡  
詔命之嚴稟承之誠旣闕王人之重祗敬之禮亦虧自隋  
季道消天下淪喪衣冠之族疆場之人或寄命諸戎或見  
拘寇手及中州旣定皇風遠肅人懷首邱途經彼境皆被  
囚繫加之重役忍苦遐外控告無所又伊吾之右波斯以  
東職貢不絕商旅相繼琛賫遭其寇攘道路由其壅塞又  
西蕃突厥戰爭已久朕愍其亂離志務安輯乃立啞利始  
可汗兄弟庶令克復舊土文泰反道敗德幸災好禍間謀  
酋豪交亂種落遂使羶裘之長亟動干戈引弓之人重罹

塗炭又焉耆之地與之臨接文泰疾其盡節輕肆凶威城池有危亡之憂士女嬰劫掠之酷加以虐用其衆毒被所部賞罰無章內外嗟怨繕造宮室勞役日新修營輿輦僭侈無度法令深刻賦斂煩重舉手動足咸罹網羅畜牧園果悉有征稅衆力已盡人財已竭饑寒總至憤歎盈途比屋連甍不勝苛政故老兒童思霑王澤朕受命上元爲人父母禁暴之道無隔內外納隍之慮切於寢興錄其舊款仍懷愍念所以頻遣使人具申朝旨勗以爲善之規示以自新之路庶知感悟無煩師旅而昏迷遂性荒怠不悛貫

盈之釁旣稔天亡之期已及況復文武具僚戎狄君長請  
傳刃者相屬懷逐雀者比肩宜順夷夏之心以申弔伐之  
典討凶渠之多罪拯無辜之倒懸今遣交河行軍大總管  
吏部尚書侯君集副總管兼右屯衛大將軍薛萬均副總  
管左屯衛將軍薛孤吳兒行軍總管武衛將軍牛進達等  
董率衆軍宏宣廟略乘驛進路同會虜庭莫不氣奪風雲  
精貫日月援桴懷憤拔距爭先良將奮建瓴之威銳卒効  
如貔之勇冀馬燕犀猶迅雷之震擊雲梯地道若至神之  
變化以此制敵事等摧枯以此屠城易於反掌然朕矜哀

金史卷之五 卷之五  
之心有懷去殺勝殘之道無忘好生若文泰面縛軍門泥  
首請罪特宏焚櫬之澤全其將盡之命自餘臣庶棄惡歸  
誠並加撫慰令各安堵示以順逆之理布茲寬大之德如  
其同惡相濟敢拒王師便盡大兵之勢以致上天之罰明  
加曉諭稱朕意焉

答房元齡請解僕射詔

夫選賢之義無私爲本奉上之道當仁是貴列代所以宏  
風通賢所以協德公忠肅恭懿明允篤誠草昧霸圖綢繆  
帝道儀則黃閣庶政惟和輔翼春宮實望斯著而忘彼大

體徇茲小節雖恭教諭之職乃辭機衡之務豈所謂弼予一人共安四海者也

答長孫無忌等上河清表詔

嘉瑞爰降必資至德大河効祉是爲希世顧惟寡昧但增慙惕乃天地表祥宗社垂祐欲使四海隆平八荒禔福王公卿士內外庶僚宜勉修正道以副靈貺焉

答荆王元景等請封禪詔

自古明王君臨區宇功齊天下道被生民內外無虞年穀豐稔莫不歸功上元致禮厚地騰茂實於六合飛英聲於



百代今公卿在列屢屬虚心嶽牧具僚固陳僉願理在難  
奪敬依來請顧循諸己仍懷慚德

官皇侶等子孫詔

梁皇侶褚仲都周熊安生沈重陳沈文阿周宏正張機隋  
何妥劉炫等並前代名儒經術可紀加以所在學徒多行  
其疏宜加優異以勸後生可訪其子孫見在者錄名奏聞  
當加引擢

詰沙門法琳詔

周之宗盟異姓爲後尊祖重親實由先古何爲追逐其短

首鼠兩端廣引形似之言備陳不遜之喻誹毀我祖禰謗  
譴我先人如此要君罪有不恕

詳定封禪儀詔

肇有蒸庶樹之司牧載籍所紀風烈猶存至於道洽品物  
功成寓縣天眷彰於符瑞人事表於隆平莫不增封岱宗  
廣禪梁甫榮鏡六合對越三神前聖所以垂其尊名後王  
所以仰其休烈蓋繇此也自火德旣衰三光分裂金行失  
御九鼎沈淪諸華競逐彝倫大壞雖周室削平趙魏隋氏  
混一文軌而金革之事未戢於封疆雅頌之音弗聞於朝

廷遂使至教闕如淳風莫反齊郊絕類帝之禮日觀缺升中之儀其已久矣朕丕膺景命嗣守洪基承大亂之餘當率土之責負展興惕納隍在慮上憑宗社之靈下資士庶之力草昧伊始援干戈以靖亂區夏旣平宏禮樂以緯俗尉候無警菑畲有年比屋咸保其歡含氣不違其性殊方異域盡地界而來庭應圖合牒殫天符而表瑞緬懷前載詳求諸己豈伊寡德能致此乎固乃上元所叶賛也而羣公卿士百辟庶僚固陳人祇之意請遵封禪之典推而不居至於數四文武之情彌切內外之議日聞誠請頻繁淹

歷年載朕繼跡百王因心萬物上奉蒼昊義在薦功下撫  
黎元方祈厚福旣迫茲理敢不祗從猥以眇身齊美上代  
永言夙志凜乎增惕可以來年二月有事泰山所司宜與  
公卿并諸儒士及朝臣有學業者詳定其儀博考聖賢之  
旨以允古今之中務盡誠敬稱朕意焉

贈百濟王扶餘璋光祿大夫仍令嫡子義慈襲封

詔

懷遠之道莫先於寵命飾終之義無隔於遐方故柱國帶  
方郡王百濟王扶餘璋棧山航海遠稟正朔獻琛奉賚克

固始終奄致薨殞追遠愍悼宜加常數式表哀榮可贈光祿大夫令其嫡子義慈嗣位授柱國封帶方郡王百濟王使祠部郎中鄭文表持節備禮冊命

求訪賢良限來年二月集泰山詔

朕遐觀前載歷選列辟莫不貴此得人崇茲多士猶股肱之佐元首譬舟楫之濟巨川若夫構大厦者採衆材於山岳善爲國者求異人於管庫是以陶唐有虞揖讓之聖帝也非元凱不能成茂功商湯姬發革命之明王也非伊呂無以定禍亂況乎齊桓中人之才器非濬哲漢武嗣業之

主志在驕奢猶賴管仲隰朋之相平津博陸之輔旣爲五  
霸之長亦稱萬代之宗是知得士則昌失人則亂朕冕旒  
夙夜虚心政道雖天地効祉宗社降靈區宇晏如俊乂咸  
事尚恐山林藪澤藏荆隋之寶卜築屠釣韞蕭張之奇是  
以躬撫黎庶親觀風俗臨河渭而佇英傑眺箕潁而懷隱  
淪亟移日月空勞夢寐而驪龍莫兆商歌寂寥豈混跡鴛  
駘未逢良樂之顧將毓德岩穴方追禽向之遊望雲長想  
增其歎息可令天下諸州搜揚所部士庶之內或識達公  
方學綜今古廉潔正直可以經國佐時或孝悌淳篤節義

昭顯始終不移可以敦風勵俗或儒術通明學堪師範或文章秀異才足著述並宜薦舉具以名聞限來年二月總集泰山庶獨往之夫不遺於版築藏器之士方升於廊廟務得奇偉稱朕意焉

停封禪詔

自古皇王受天之命建顯號於封禪揚洪名於竹帛者莫不功濟夷夏道叶人祇然後登泰山之高刊梁甫之石未有七德靡記九部寂寥而欲齊聲於聖哲垂美於篆籀者也朕承宗廟之重當區宇之責寅畏三靈憂勤萬姓雖戡

翦禍亂克定遐荒而至教猶鬱刑典未措勝殘之化未洽  
於率土和平之風多慙於往烈是以覽經籍而自失想壇  
場而增懼亟寢摺紳之奏屢拒公卿之請逡巡大典荏苒  
厯載近者文武百僚州縣庶尹頻繁抗表殷勤固陳咸以  
爲兩儀交泰四夷賓服禮讓興行年穀豐稔蒼昊呈符於  
上靈符不可以久替黎獻協心於下衆欲不可以固拒朕  
迫茲羣議敢不敬從欲薦功上元大報后土升中之儀已  
具省方之期有日今太史奏有彗星出於西方朕撫躬自  
省深以戰慄良繇功業之被六合猶有未著德化之覃八



表尚多所闕遂使神祇垂祐警戒昭然朕畏天之威寢興靡措且曠代盛典禮數非一行途之間勞費不少東夏凋弊多未克復將送儀仗轉運糧儲雖存節省之儀終煩黎庶之力非唯上虧天意亦恐下失人心解而更張抑有故實前以來年二月有事泰山宜停庶夙夜自修遂其罪己之志勤恤匪懈申其納隍之情儻蒙靈祇迴睠宗社介福朝廷同於大道風俗歸於樸素告成之美更思其宜仍命所司泰山有前代帝王因封禪立碑及石函玉檢之類往遭離亂被賊毀發並修立瘞藏之

賜竇靖詔

北方之務悉以相委以卿爲寧朔大使撫鎮華戎朕無北顧之憂矣

矜宥周隋名臣子孫罪犯詔

朕聽朝之暇觀前史每覽前賢佐時忠臣徇國何嘗不想見其人廢書欽歎至於近代以來年歲非遠然其允緒或當見存縱未能顯加旌表無容棄之遐裔其周隋二代名臣及忠節子孫有貞觀已來犯罪配流者宜令所司具錄奏聞

皇太子用庫物勿限制詔

儲貳不會自古常式近代以來多爲節限求之故實深非  
事宜自今皇太子出用庫物所司勿爲限制

答皇太子承乾詔

汝家之冢嫡國之儲兩故有斯命以彰有殊入學齒冑則  
君臣之義也同之府庫實父子一體也是以君子富而不  
驕謙而受益奢則不孫以約失之者鮮矣勉思守道無煩  
致謝

刊正氏族詔

氏族之盛實繫於冠冕婚姻之道莫先於仁義自有魏失御齊氏云亡市朝旣遷風俗陵替燕趙右姓多失衣冠之緒齊韓舊族或乖德義之風名雖著於州閭身未免於貧賤自號膏粱之胄不敦匹敵之儀問名惟在於竊貲結褵必歸於富室乃有新宦之輩豐財之家慕其祖宗競乎婚媾多納財貨有如販鬻或自貶家門受屈辱於姻婭或矜誇舊望行無禮於舅姑積習成俗迄今未已旣紊人倫實虧名教朕夙夜兢惕憂勤政道往代蠹害咸已懲革惟此弊風未能盡變自今以後明加告示使識嫁娶之序務合

禮典稱朕意焉

追封巢王元吉詔

有虞受終宏肆赦之典隆周革命篤親親之恩海陵刺王  
元吉地維藩翰夙承朝寵陷於不軌得罪君親朕嗣膺靈  
命無忘敦睦同生之重旣切於本枝在原之悼實纏於歲  
月興言泉壤思備寵章可追封巢王謚仍依舊

授長孫無忌司徒詔

古先哲后咸正庶官德優者爵高功多者祿厚是以經邦  
緯國必俟蕭曹之勲變理陰陽允歸鍾華之望司空趙公

無忌識量宏博風度峻遠地惟親賢才稱梁棟締構霸業  
茂勲著於艱難弼成王道廼心竭於寅亮鹽梅是寄丹青  
攸屬德綜機衡聲猷具舉自升槐鉉歲月亟移固以勒美  
太常書忠甲令者矣宜陟中台式典邦教可司徒

授房元齡司空詔

惟天爲大資四序以成功惟王建國候三台以宏化故隆  
漢受命吳鄧飛聲有晉勃興荀何底績開府儀同三司尚  
書左僕射太子少師上柱國梁國公元齡器範忠肅識具  
明允才稱王佐望乃時英霸國爰始預經綸之業鼎命維

新贊隆平之化誠固金石勲勒鐘鼎自任總庶尹職重朝  
端心力盡於翼亮劬勞積於歲序而志在沖退有懷止足  
固陳衰疴屢上表疏然則變揆禮閣職務實繁論道槐廷  
望實攸屬宜加寵命平茲水土可司空

禁諱盜詔

盜賊之作爲害實深州縣官人多求虛譽苟有盜發不欲  
陳告鄉村長正知其此情遽相勸止十不言一假有披論  
先劾物主爰及鄰伍久嬰縲絏有一於斯甚虧政化自今  
已後勿使更然所司明加採察隨事繩糾

宥党仁宏答房元齡等手詔

夫爲政之大慎枉刑獄縱捨任心以欺衆庶罪一也知人不明委用貪冒罪二也善善未賞惡惡不誅罪三也若斯三者豈得無過以公固諫且依來請

追復息隱王皇太子禮詔

昔戾園敗德西都表其號謚楚英干紀東漢錫其湯沐斯皆屈邦國之禁申骨肉之恩也息隱王地乃居長守器運初自貽伊戚陷於禍難日月逾邁松楸成行朕嗣守鴻基緬尋遺烈何嘗不陟彼岡而靡觀瞻同株而疚懷恩備哀



榮式加禮命可追復皇太子諡仍依前陵曰隱陵置令以  
下官并加戶守衛

欽定全唐文卷七目錄

太宗四

圖功臣像於凌烟閣詔

賜魏王泰詔

責齊王祐詔

久旱簡刑詔

薄葬詔

廢皇太子承乾爲庶人詔

立晉王爲皇太子詔

黜魏王泰詔

令州縣舉孝廉茂才詔

以旱減膳詔

命皇太子知左右屯營兵馬事詔

封高麗王嗣子藏詔

有事南郊詔

賜酺三日詔

賜皇太子手詔

命張儉等征高麗詔

親征高麗手詔

命將征高麗詔

建三師詔

答劉洎詔

答元奘還至于闐國進表詔

追贈殷太師比干諡詔

命皇太子監國詔

答有司請忌日仍理軍務詔

克高麗遼東城詔

收瘞征遼士卒詔

克高麗白巖城詔

破高麗賜酺詔

禁遼東重刑詔

授高延壽高惠真官爵詔

賞渡遼戰功詔

班師詔

賜定州宴會詔

賜劉洎自盡詔

定皇太子與臣工書疏式詔

諭高履行手詔

欽定全唐文卷七

太宗四

圖功臣像於凌烟閣詔

自古皇王褒崇勲德旣勒銘於鐘鼎又圖形於丹青是以  
甘露良佐麟閣著其美建武功臣雲臺紀其迹司徒趙國  
公無忌故司空揚州都督河閒元王孝恭故司空萊國文  
成公如晦故司空相州都督太子太師鄭國文貞公徵司  
空梁國公元齡開府儀同三司尚書右僕射申國公士廉  
開府儀同三司鄂國公敬德特進衛國公靖特進宋國公

瑀故輔國大將軍揚州都督襄忠壯公志元輔國大將軍  
夔國公宏基故尚書左僕射蔣忠公通故陝東道大行臺  
尚書右僕射鄖節公開山故荊州都督譙襄公柴紹故荊  
州都督邳襄公順德雒州都督鄖國公張亮光祿大夫吏  
部尚書陳國公侯君集故左驍衛大將軍郾襄公張公謹  
左領軍大將軍盧國公程知節故禮部尚書永興文懿公  
虞世南故戶部尚書渝襄公劉政會光祿大夫戶部尚書  
莒國公唐儉光祿大夫兵部尚書英國公李勣故徐州都  
督胡壯公秦叔寶等或材推棟梁謀猷經遠綱紀帷帳經



綸霸圖或學綜經籍德範光煒隱犯同致忠讜日聞或竭  
力義旗委質藩邸一心表節百戰標奇或受脤廟堂關土  
方面重氛載朗王略遐宣並契闊屯夷劬勞師旅贊景業  
於草昧翼淳化於隆平茂績嘉庸冠冕列辟昌言直道牢  
籠搢紳固以瞻伊呂而連衡邁方召而長驚者矣宜酌故  
實宏茲令典可並圖畫於凌烟閣庶念功之懷無謝於前  
載旌賢之義永貽於後昆

賜魏王泰詔

地記之設繇來尚矣區外具於山經海內陳於夏載職方

王制纔舉淮夷漢志晉圖略記郡國自茲以降著作實繁  
或學非博通多所遺闕或地分南北雅有短長求其折中  
無聞盡善左武侯大將軍雍州牧相州都督魏王泰體業  
貞固風鑒凝邈學綜策府文冠詞林樂善表於夙夜好士  
彰於吐握討論輿地詳延儒雅博采方志得之於舊聞旁  
求故老考之於傳信內殫九服外極八荒憲章之規條目  
有序戎夏之域今古無遺簡而能周博而尤要足以度越  
前載垂之不朽宜加褒錫以申獎勸可賜物一萬段其書  
宜付祕閣

責齊王祐詔

吾嘗誡汝勿近小人正爲此也汝素乖誠德重惑邪言自延伊禍以取覆滅痛哉何愚之甚也爲梟爲獍忘孝忘忠擾亂齊郊誅夷無罪去維城之固就積薪之危壞盤石之基爲尋戈之釁背禮違義天地所不容棄父無君神人所共怒往是吾子今爲國讎萬紀存爲忠烈死不妨義汝則生爲賊臣死爲逆鬼彼則嘉聲不隕而爾惡跡無窮吾聞鄭叔漢戾並爲猖獗豈期生子乃自爲之吾所以上慚皇天下愧后土惋歎之甚知復何云

久旱簡刑詔

去冬之閒雪無盈尺今春之內雨不及時載想田疇恐乖  
豐稔農爲政本食乃人天百姓嗷然萬箱何冀昔頽城之  
婦隕霜之臣至誠所通感應天地今州縣獄訟常有冤滯  
者是以上天降鑒延及兆庶宜令覆囚使至州縣科簡刑  
獄以申枉屈務從寬宥以布朕懷庶使桑林自責不獨美  
於殷湯齊郡表墳豈自高於漢代

薄葬詔

朕聞死者終也欲物之反於真也葬者藏也欲人之不得

見也上古垂風未聞於封樹後聖貽則始備於棺槨譏僭侈者非不愛其厚費美儉薄者實亦貴其無危是以唐堯聖帝也穀林有通樹之說秦穆明君也橐泉無邱隴之處仲尼孝子也防墓不墳延陵慈父也嬴博可隱斯皆懷無窮之慮成獨決之明乃便體於九泉非徇名於百代也洎乎闔閭違禮珠玉爲鳬鴈始皇無度水銀爲江海季孫擅魯斂以璠璣桓魋專宋葬以石槨莫不因多藏以速禍由有利而招辱元廬旣發致焚如於夜臺黃腸再開同暴骸於中野詳思曩事豈不悲哉由此觀之奢侈者可以爲戒

節儉者可以爲師矣朕居四海之尊承百王之弊未明思  
化中宵載惕雖送往之典詳諸儀制失禮之禁著在刑書  
而勲戚之家多流遁於習俗閭閻之內或侈靡而傷風以  
厚葬爲奉終以高墳爲行孝遂使衣衾棺槨極雕刻之華  
靈輻明器窮金玉之飾富者越法度以相尚貧者破資產  
而不逮徒傷教義無益泉壤爲害旣深宜爲懲革其王公  
以下爰及黎庶自今以後送葬之具有不依令式者仰州  
府縣官明加檢察隨狀科罪在京五品以上及勲戚之家  
仍錄奏聞

廢皇太子承乾爲庶人詔

肇有皇王司牧黎庶咸立上嗣以守宗祧固本忘其私愛  
繼世存乎公道故立季歷而樹姬發隆周享七百之期黜  
臨江而罪戾園炎漢定兩京之業是知儲副之寄社稷繫  
以安危廢立之規鼎命由其輕重詳觀歷代安可非其人  
哉皇太子承乾地惟長嫡位居明兩訓以詩書教以禮樂  
庶宏日新之德以永無疆之祚而邪僻是蹈仁義蔑聞踈  
遠正人親昵羣小善無微而不背惡無大而不及酒色極  
於沈荒土木備於奢侈倡優之技晝夜不息狗馬之娛盤

遊無度金帛散於姦慝捶楚遍於僕妾前後愆過日月滋甚朕永鑒前載無忘正嫡恕其瑕釁倍加訓誘選名德以爲師保擇端士以任宮僚猶冀中人之性可以上下蟠木之質可以爲容愚心不悛凶德彌著自以久嬰沈痼心憂廢黜納邪說而違朕命懷異端而疑諸弟恩寵雖厚猜懼愈深引姦回以爲腹心聚臺隸而同遊宴鄭聲淫樂好之不離左右兵凶戰危習之以爲戲樂旣懷殘忍遂行殺害然其所愛小人往者已從顯戮謂能因茲改悔翻乃更有悲傷行哭承華制服博望立遺形於高殿日有祭祀營窀



宓於禁苑將議加崇贈官以表愚情勒碑以紀凶跡旣傷  
敗於典禮亦驚駭於視聽桀跖不足比其惡行竹帛不能  
載其罪名豈可守器纂統承七廟之重入監出撫當四海  
之寄承乾宜廢爲庶人朕受命上帝爲人父母凡在蒼生  
皆存撫育況乎冢嗣寧不鍾心一旦至此深增慙歎

立晉王爲皇太子詔

昔者哲王受圖上聖垂範建儲貳以奉宗廟總監撫以寧  
邦國旣義在於至公亦事兼於權道故以賢而立則王季  
興周以貴而升則明帝定漢詳諸方冊豈不然乎并州都

督右武侯大將軍晉王治地居茂親才惟明哲至性仁孝  
淑質惠和夙著夢日之祥早流樂善之譽好禮無倦強學  
不怠今承華虛位率土繫心疇咨文武咸所推戴古人云  
知子莫若父知臣莫若君朕謂此子實允衆望可以則天  
作貳可以守器承祧永固百世以貞萬國宜立治爲皇太  
子可令所司備禮冊命

黜魏王泰詔

朕聞生育品物莫大乎天地愛敬罔極莫重乎君親是故  
爲臣貴於盡忠虧之者有罰爲子在於行孝違之者必誅

大則肆諸市朝小則終貽黜辱雍州牧相州都督左武侯  
大將軍魏王泰朕之愛子實所鍾心幼而聰令頗好文學  
恩遇極於隆重爵位窮於寵章不思聖哲之戒自構驕僭  
之咎惑讒諛之言信離閒之說以承乾雖居長嫡久纏疴  
恙潛有代立之望靡遵義方之則承乾懼其凌奪泰亦日  
增猜沮爭結朝士競引凶人遂使文武之官各有託附親  
戚之內分爲朋黨朕志存公道義在無偏彰厥巨釁兩從  
廢黜非惟作則四海亦乃貽範百代可解泰雍州牧相州  
都督左武侯大將軍并削爵土降爲東萊郡王

令州縣舉孝廉茂才詔

朕觀前烈建國君臨未有不藉忠良而能濟其功業者也  
朕顯承宗祀獲奉鴻基側席求賢有年載矣而山林莫致  
珍玩必臻豈朕好惡之情未達於下其令州縣舉孝廉茂  
才好學異能卓犖之士

以旱減膳詔

朕以寡德祗膺寶命而政慚稽古誠闕動天和氣愆於陰  
陽亢旱涉於春夏靡愛斯牲莫降雲雨之澤詳思厥咎在  
予一人今避茲正殿以自剋責尚食常膳亦宜量減京官

五品已上各進封事極言無隱朕將親覽以答天譴

命皇太子知左右屯營兵馬事詔

皇太子治忠孝成德志業光茂地惟儲副寄深監撫兼統  
禁旅實允舊章宜知左右屯營兵馬事其大將以下並受  
處分

封高麗王嗣子藏詔

懷遠之規前王令典繼世之義列代舊章高麗王嗣子藏  
器懷韶敏識宇詳正早習禮教德義有聞肇承藩業誠款  
先著宜加爵命允茲故實可上柱國封遼東郡王高麗王

遣使持節冊命

有事南郊詔

朕聞上靈之應疾於影響茂祉之興積於年代朕嗣膺寶  
歷君臨區宇憑宗社之介福賴文武之同心時無風塵之  
警野有京坻之積厚地降祉貞石表祥瑩翠色而流光發  
素質而成字前紀厥初之德次陳卜年之永後述儲貳之  
美並名字昭然楷則相次曠代之所未聞故老之所未覩  
猥以寡德虔奉成命緬惟往載良增兢惕自天之佑豈惟  
一人無疆之福方覃九土自非大報泰壇稽首上帝則靡

申奉天之志寧副臨下之心今年冬至有事南郊所司率  
繇舊典

賜酺三日詔

朕嗣守宗祧夙夜寅懼憂勤在於政道撫育遍於含生十  
七載於茲矣上元儲祉貞石表瑞朕式備禋燎躬謝蒼旻  
逮於儲兩亦申虔奉朔風旣切飛雪載零及登泰壇六合  
開朗神祇介福豈獨在予和樂之慶宜被率土可賜酺三  
日自漢魏以來或賜牛酒牛之爲用耕稼所資多有宰殺  
深乖惻隱其男子年七十已上量給酒米麴梁州管內大

辟罪已下見禁囚皇太子慮過諸州並遣使人分往唯十惡不在慮限餘皆量情降宥焉

賜皇太子手詔

吾昨見麋鹿懷孕者多縱有空身其子甚小母亡而子存者未之有也吾與汝雖復不射無仁心之人得便終無放理昆蟲無知須推己以及也推己之孝於父母以及此類則天下有識者懷之推己之惡死以及蟲豸含生之屬何有不賴所以明日不行

命張儉等征高麗詔



百濟高麗恃其僻遠每動兵甲侵逼新羅新羅日蹙百姓塗炭遣使請援道路相望朕情深愍念爰命使者詔彼兩蕃戢兵敦好而高麗姦惑攻擊未已若不拯救豈濟倒懸宜令營州都督張儉守左宗衛率高履行等率幽營二都督府兵馬及契丹奚靺鞨往遼東問罪

親征高麗手詔

行師用兵古之常道取亂侮亡先哲所貴高麗莫離支蓋蘇文弑逆其主酷害其臣竊據邊隅肆其蜂蠆朕以君臣之義情何可忍若不誅翦遐穢無以激肅中華今欲巡幸

幽薊問罪遼碣行止之宜務存節儉所過營頓無勞精飾  
食唯充饑不須珍膳水可涉度者無假造橋路可通行者  
不勞修理御營非近縣學生老人等無煩迎謁隋室淪亡  
其源可覩良繇智略乖於遠圖兵士疲於屢戰政令失度  
上下離心德澤不加於匹夫刻薄彌窮於萬姓當此時也  
高麗之主仁愛其人故百姓仰之如父母煬帝殘暴其下  
故衆庶視之如仇讎以思亂之軍擊安樂之卒務其功也  
不亦難乎何異入水而惡其濡踐雪而求無迹朕緬懷前  
載撫躬內省昔受鉞專征提戈撥亂師有經年之舉食無

盈月之儲至於賞罰之信尚非自決然猶所向風靡前無  
橫陣蕩氛霧於五嶽翦虎狼於九野定海內拯蒼生然則  
行軍用兵皆億兆所見豈煩言哉及端拱巖廊定策帷扈  
身處九重之內謀決萬里之外北殄匈奴種落有若摧枯  
西滅吐谷渾高昌易於拾芥包絕漠而爲苑跨流沙而爲  
池黃帝不服之人唐堯不臣之域並皆委質奉貢歸風順  
軌崇威啟化之道此亦天下所共聞也況今豐稔多年家  
給人足餘糧栖畝積粟紅倉雖足以爲兵儲猶恐勞於轉  
運故多驅牛羊以充軍食人無裹糧之費衆有隨身之廩

如斯之事豈不優於曩日加以躬先七萃親決六奇使攻  
無所守戰無所拒略言必勝之道蓋有五焉一曰以我大  
而擊其小二曰以我順而討其逆三曰以我安而乘其亂  
四曰以我逸而敵其勞五曰以我悅而當其怨何憂不尅  
何慮不摧可布告元元勿爲疑懼耳

命將征高麗詔

觀乎天道鼓雷霆以肅萬物求諸人事陳金革以威四方  
雖步驟殊時質文異制其放殘殺禁暴虐戮干紀討未賓  
莫不扶義而申九伐文德昭於率土因時而董三令武功

成於止戈朕祇膺寶厯君臨寓縣憑宗社之靈藉卿士之力神祇儲祉夷夏宅心故上柱國遼東郡王高麗王高建武夙披丹款早奉朝化忠義之節克著於嶠夷職貢之典不愆於王會而其臣莫離支蓋蘇文包藏凶慝招集不逞潛懷異計奄行弑逆冤酷纏於滅貊痛悼徹於諸華纂彼藩緒權其國政法令無章賞罰失所下陵上替遠怨邇嗟加以好亂滋甚窮兵不息率其羣凶之徒屢侵新羅之地新羅喪土憂危日深遠請救援行李相屬朕愍其倒懸之急爰命輜軒之使備陳至理喻以休兵曾不知改莫遵朝

命窺窬亭障首鼠窟穴完聚更切賦斂尤繁丁壯盡於鋒  
刃羸老弊於版築久廢耕桑咸罹饑饉生肉表異顯其亡  
徵兩血爲妖彰其數盡比室愁苦闔境哀惶華髮青衿不  
勝苛政延頸企踵思沾王澤昔有苗弗率勞大禹之駕葛  
伯仇餉動成湯之師況亂常巨寇紊三綱而肆逆滔天元  
惡窮五刑而莫大者哉朕所以宵衣興慮日旰忘食討罪  
之意旣深於投袂救人之義彌軫於納隍類上帝而戒途  
詔夏官而鞠旅可先遣使持節遼東道行軍大總管英國  
公勣副總管江夏郡王道宗士馬如雲長驅遼左奮夷嶽

之威屠豕虵於險瀆乘建瓴之勢斬鯨鯢於鏤方行軍總  
管執失思力行軍總管契苾何力率其種落隨機進討契  
丹蕃長於勾折奚蕃長蘇支燕州刺史李元正等各率其  
衆絕其走伏使持節平壤道行軍大總管張亮副總管常  
何總管左難當等舟楫相繼直指平壤新羅王金善德傾  
其城邑竭其府藏荷不貲之澤復累葉之讎出樂浪而衝  
腹心臨沃沮而蕩巢穴百濟王扶餘義慈早著丹款深識  
時機棄厯稔之私交贊順動之公戰羸糧蓄銳唯命是從  
凡此諸軍萬里齊舉頓天羅於海浦橫地網於遼陽朕然

後經塗白狼之右親巡元菟之城執鼗鼓而戒六軍載太常而麾八陣使流湯者魚爛握炭者冰消誅渠魁於惡稔弔黎庶於厥角其或擁衆立功或行閒自拔宜宏寬大各復農土有勞者當加其賞懷能者不滯其才如其長惡莫悟迷途遂往斧鉞旣下必嬰喪元之悲玉石一焚徒軫噬臍之嘆具宣朕旨咸使知聞

建三師詔

朕比尋討經史明王聖帝曷嘗無師傅哉前所進令遂不覩三師之位黃帝學太顓顓頊學綠圖堯學尹壽舜學務



成昭禹學西王國湯學威子伯文王學子期武王學號叔  
前代聖王未遭此師則功業不著乎天下名譽不傳乎載  
籍況朕接百王之末智不同聖人其無師傅安可以臨兆  
民者哉詩不云乎不愆不忘率由舊章夫不學則不明古  
道而能致太平者未之有也可即著令置三師之位

答劉洎詔

非慮無以臨下非言無以述慮比有談論遂致煩多輕物  
驕人恐由茲道形神心氣非此爲勞今聞讜言虛懷以改

答元奘還至于闐國進表詔

聞師訪道殊域今得歸還歡喜無量可即速來與朕相見  
其國僧解梵語及經義者亦任將來朕已勅于闐等道使  
諸國送師人力鞍乘應不少乏令燉煌官司於流沙迎接  
鄯善於沮沫迎接

追贈殷太師比干謚詔

昔望諸列國之相漢主尚求其後夷吾霸者之臣魏君猶  
禮其墓況乎正直之道邁青松而孤絕忠勇之操掩白玉  
而振彩者哉殷故少師比干貞一表德臣隣成性以明允  
之量屬無妄之辰玉馬遽馳愍其邦之殄悴寶衣將燎惜

其君之覆亡見義不回懷忠蹈節讜言纔發輕百齡之命  
淫刑旣逞碎七尺之軀雖復周王封墓莫救焚原之禍孔  
聖稱仁寧逌剖心之痛固已冤深終古悼結彼蒼朕觀風  
趙北問罪遼東經途秀麥之墟緬懷梓林之地駐蹕而瞻  
荒隴願以爲臣撫躬而想幽泉思聞其諫豈可使盡忠之  
義久闕於往冊揚名之典無聞於後代宜錫寵命以展夙  
心可追贈太師諡曰忠烈公仍遣三品持節祭告四品爲  
副封崇其墓修葺祠堂州縣春秋二時祀以少牢給隨近  
五戶以供祭享及灑掃

命皇太子監國詔

朕以寡薄君臨區夏奉神祇之永命當億兆之重責宵衣旰食憂六宮之未安寒心銷志懼一物之失所滅貊僻遠豺狼縱毒元兇尚稽乎天罰遺黎久陷於坑穽朕是以發自漚澗言巡遼碣命元戎以先驅播凱澤於遐裔省方之務旣勞於躬親監國之重允屬於儲貳皇太子治溫文表德睿哲日躋仁孝之誠彰於溫清絃誦之美著於膠庠禮義旣茂徽猷彌遠委以賞罰之權任以軍國之政詳諸前載實惟令典發定州巡遼左之後宜令太子治監國其宗

廟社稷百神咸令主祭軍國事務並取決斷

答有司請忌日仍理軍務詔

省所奏悲感何言天地運流弓劍渺邈方寸久亂泣血無  
追憂乃終身豈惟一日哀以內結非假外彰今旣戎旅事  
大不可失在機速昔周武伐殷載廟在道雖多虧小禮而  
功成大孝往賢之道可不遵歟所以仰順古風俯從今請  
臨紙摧心慟焉如割

克高麗遼東城詔

五兵爰始軒皇戰於阪泉七德收基唐帝尅於丹浦莫不

除剪暴逆克濟生靈斥土開疆威加四海朕欽承寶厯削  
平天下六合之內咸以爲家三光所臨義無偏照繇是環  
裨之表咸淼淼以航深垓寓之中盡容容而面內而島夷  
陪隸虐殺其君毒被朝鮮災流濊貊幼孤者不勝苛暴忠  
槩者仰我來蘇朕言念匪人深懷夕惕親御戎軒躬執金  
鼓意在以殺止殺仁育被於羣生用刑清刑義征戡於不  
諱廓滔天而調雨露擒猾夏以正封疆用此佳兵事非獲  
已仰申天罰遂乃龔行先命行軍大總管英國公勳行軍  
總管張儉等率領驍銳元戎啟行北狄西戎之酋咸爲將

帥奚霫契丹之旅皆充甲卒如貔億計躍馬千羣總萃遼東之城攻其南面副大總管江夏郡王道宗第一軍總管號國公張士貴等率五陵之勁騎董六郡之良家分麾引道攻其西面申命前軍大總管夔國公宏基等分統猛士填其濠塹賊據城臨險激梁水以環流聳堞凌雲壓頽山而靡懼於是雲羅四合地道九攻危城倏已復隍湯池俄而失險猶且析骸窮壘壁巢幕以偷安轉骨深溝坐積薪而待燎愍其塗炭申其再造頻加誨誘固執迷塗繇是猛士衝冠壯夫挺劒咸頓首於馬前請因機而電掃難違衆

議爰詔許之乃分命諸軍四面雲合朕登高迴矚授其節  
度又命檢校太常卿鄂國公敬德領黃門之軍樂奏元雲  
之雅歌將帥聞而增憤士卒繇其作氣於時凍雨初晴驚  
風漸急聊命縱火數處熸然焚其樓雉並爲煨燼合城男  
子面縛軍門取彼渠魁屬之司敗千載逋寇一朝清蕩斯  
並宗廟威靈上元幽贊忠臣猛將盡節陳謀勁卒勇夫輕  
身效命協同心力成此大功豈朕一人獨能致此今茲尅  
捷普天同慶宜令頒下咸使聞知

收瘞征遼士卒詔



日者隋師度遼時非天贊從軍士卒骸骨相望遍於原野  
良可哀嘆掩骼之義抑惟先典其令並收瘞之

克高麗白巖城詔

上天之道先德而後刑王者之師有征而無戰是以爰農  
翦暴風沙自縛其君元德一興有苗不固其險朕勞神濟  
物用百姓而爲心則天宏化環四海而開宇義非獲已繇  
是舉兵每蓄哀矜深存宥罪自濟遼水先令告喻而蓋牟  
不革其面遼東猶抗其斧旣觸天網遂縱兵鋒未展鷹揚  
已皆魚爛朕乃鼓行乘勝師次白巖兇徒相率登陴拒守

因山構壘仰切浮雲縈澗䟽隍下臨無景妖氛蝟聚如憑  
劒閣之深同惡鴟張若負洞庭之險乃命行軍大總管英  
國公勣等統咀羗冠鷄之將率挈黿斬蛟之士石發甚於  
星竇樓毀同於山壤朕憫彼同焚情深惻隱乃親御八駿  
幸勅三軍賊旣倒懸方思轉禍積甲齊於熊耳獲庾方於  
海陵建十州之旗各復於桑梓反三韓之士不易於農肆  
焚櫬錫爵驅馳遼涓之間鑿井耕田編列弁辰之野古人  
有言曰全國爲上蓋斯之謂焉又燕碣土風素多霖淫軒  
皇遭召雨之寇晉后苦涌水之災自朕出師上靈幽贊旭

日澄靄膚雲輟陰所指未有堅城所向乃無完陣天道人事義等合符窮穴傾巢庶將非遠宜以大慶頒示普天

破高麗賜酺詔

上帝明威鼓雷霆而震曜先王仗順用甲兵而弔伐故能經綸九野清滌八荒二十七征元王創其鴻業五十二戰黃運垂其大名騰有國之英猷光列代之通典朕荷構乾象大庇羣生池濛汜而苑扶桑紐天紘而疆日域蠶茲皮服敢亂天常但折彼蝨股何俟五丁之力射其雀目無假萬弩之機然以先聖救焚成言援手自惟己任是用躬親

故知矢石交前非勝巖廊之道介冑爲飾不逮旒冕之容  
若命將以授戈愧奉身而役物爰親征而沐雨務勞形以  
安衆一義宜鑒所向弗違自涉遼陽受降之城累築曾未  
期月獻凱之歌日奏傳烽告捷異往昔之照甘泉資敵爲  
糧矯向時之挽紅粟復以今日中攻其安市城重圍四布  
勢同三板之危縣命短晨哀其守陴之哭高麗僞主掃其  
境內罄茲驍銳咸發從軍爰自平壤長驅影援有徒十五  
萬連旗三十里烟火稽天若黃虵之吐霧穀騎橫野邁赤  
蟻之爲羣朕私心計其地形屈指籌其破日分命衆將各

稟新書臨事設奇因機制變行軍大總管李勣率總管號  
國公張士貴等馬步軍十四總管當其西南面又命趙國  
公無忌率馬步軍二十六總管馳自東谷合其來道抵背  
扼喉塞其歸路朕乃潛師偃旆登於北山候彼交鋒於茲  
聳轡若處中天之闕俯周宮於目前如登太岳之岑觀魯  
封於掌內出其不意凶徒遂擾初爲一陣四拒勣軍及此  
三分因而大潰流血川溢滄波爲之暫丹斬級彌山髓骨  
以之成岳蓋由鏑鋒交下玉石同湮雖則可哀理無兼濟  
其兵將大釋薩延壽惠真率其餘衆一心輸款但高麗國

政本闕二人今總委僞軍隻輪不返大慶允集益深祗懼  
可歸美清廟昭告懋功頒示萬邦賜酺三日

### 禁遼東重刑詔

自莫離支爲主官以賄成單貧之家困於稅斂一馬匹布  
隻兔纖鱗或進域主或輸耨薩其有自給類加箠楚編戶  
饑寒莫知告訴至斯責罰即用夷刑反接鞭笞下手無數  
瘡深快意然後乃已所以陳兵伐罪兼暢皇風使懷附之  
徒同霑聲教息彼貪殘除其弊俗今遼東之野各置州縣  
或有舊法餘風未殄宜即禁斷令遵國憲

授高延壽高惠真官爵詔

西戎賢相寵光秦冊北夷嗣子榮珥漢貂羈以長纓用表  
元功之大掩茲宏網式昭天覆之博高麗位頭大兄理大  
夫後部軍主高延壽大兄前部軍主高惠真等并馬韓酋  
長鯁海英髦分義景於扶桑數鍾天厭竊封疆於孤竹自  
貽神怒臨危轉禍率衆來降申其膝行之敬成其面縛之  
禮向風舉踵良足可嘉咸宜收其俊才嗣烏官於郟子錄  
其成效映龜組於梅鎔延壽可鴻臚卿惠真可司農卿

賞渡遼戰功詔

授以勲級本據有功若不優異無繇勸獎今討高麗其從  
駕爰及水陸諸軍戰陣有功者並聽從高品上累加

班師詔

朕聞之聖人慎罰觀兵於再駕明王舉事制勝於三年合  
諸侯以討逆旣擒而且縱總海內以除殘臨行而止殺其  
故何哉信繇上天之德曰生王者之師曰義是以網開三  
面干舞七旬豈有恣欲稜威取鯨鯢而竭澤覆巢探穴罄  
麇卵以塗原者乎憬彼島夷僻居鯁壑晉皇淹駕纔克一  
城隋帝頻師淪兵百萬朕光承寶厯司牧普天陶化紫宸



法兩儀而導俗推心黔首徇萬寓以勞神纖介不安終宵  
輟寢蠻陬未艾日旰忘飡是以遠涉天涯比焦原而未險  
長驅若木譬平圃以非遙憤角遼陽躬親節度撻金海表  
震曜威靈尅其元菟橫山蓋牟磨米遼東白巖卑沙麥谷  
銀山後黃等合一十城凡獲戶六萬口十有八萬覆其新  
城駐蹕建安合三大陣前後斬首四萬餘級降其大將二  
人裨將及官人酋帥子弟三千五百兵士十萬人並給程  
糧放還本土又獲牛馬各五萬館穀十旬不假贏糧之費  
徒兵累萬咸發兼乘之歌自夏涉秋係虜相次繇燕及雍

襁負不絕緬維湯文取亂嘗懷偃伯之心虞夏勝殘實宏  
光被之美有懷戢武造次何忘但以賊帥莫離支猶不授  
首本圖未果志無旋旆忽屬徼外霜嚴海濱寒沍念茲兆  
衆便命班師朕所向必摧上靈之祐也所攻無敵勇夫之  
力也方且仰酬元澤展大禮於郊禋賚此勤勞錄摧鋒於  
將士有勲者別頒榮命無勲者並加優恤諸渡遼海人應  
加賞命及優復者所司宜明爲條例具狀奏聞朕將親爲  
詳覽以申後命

賜定州宴會詔

皇太子愛敬所覃格於四海仁孝所感周於百姓自春監國旣處定州首創德風在乎茲境所以事君養民之道有隱無犯之情爰自中山流於率土地居宣化之本人稟純孝之深有足可嘉特須優異其定州管內以孝行聞者宜與宗姓老人同賜宴會

賜劉洎自盡詔

小人在列爲蠹則深巨猾當樞懷惡必大侍中檢校戶部尚書清苑縣開國男劉洎出自閭伍言行罕稱於國無涓滴之勞在朕匪粉榆之舊但以驅策稍久頗有吏能擢於

凡瑣之間收其鳴吠之用超倫越品使居常伯紆青襲紫  
攝職文昌冀有葵藿之情知慙雨露之澤茲朕行履小乖  
和豫凡百在位忠孝纏心每一引見涕泗交集洎獨容顏  
自若密圖他志今行御進狀奏洎乃與人竊議窺窬萬一  
謀執朝衡自處霍光之地窺弄兵甲擅總伊尹之權猜忌  
大臣擬皆夷戮朕親加臨問初猶不承傍人執證方始具  
伏此如可恕孰不可容且皇太子治春秋鼎盛聲溢震方  
異漢昭之童幼非周成之襁褓輒生負圖之望是有無君  
之心論其此罪合從拏戮但以夙經任遇不忍梟懸宜免

家累賜其自盡

定皇太子與臣工書疏式詔

皇太子地在震方禮絕羣后而令書法式未著彝章近代以來例皆名白謙過逼下書依衆庶無以別貴賤之差將何顯尊卑之序理非通允宜有更張凡處分論事之書皇太子並宜畫令左右庶子以下署名宣奉行書按次畫日其餘與諸親及師傅等書不在此限

諭高履行手詔

古人立孝毀不滅身聞卿絕粒殊乖大體宜抑摧裂之情

割傷生之累